

**Sujet:**

# **HUGH!**

Wott ain im Lääbe reüssiere,  
goot er an d Uni go studiere,  
und het er alles richtig droffe,  
stoot em e scheeni Lauffbaan offe,  
e tolle Titel, guete Loon  
und zletscht e scheeni Bangsioon.  
Doch d Uni, s duet nit alle gfalle,  
hilft nit nur Deggter, si hilft alle,  
fir dass, was um is umme goot,  
au der Hinderletscht verstoot.  
Zem Byschpiil wär der Schnuppe het,  
gheert uff em schnällschte Wääg ins Bett.  
Denn die Koggen und Baggdeerie  
hogge gäärn in den Arteerie.  
Am beschte losst me sich lo impfe.  
Me sott nit iber d Uni schimpfe.  
Die hänn nit nur, si gänn sich Mie  
fir d Wisseschaft, und denn no wie!

So hänn in langen liberstunde  
Ethnologue uusegfunde,  
ass s uff der Ärde Velgger git,  
wo niemets dervoo waiss, bis hitt.  
Zem Byschpiil ässe Menschefrässer  
mit Leffel, Gaable, Dessermässer  
und raffinierte Dischmaniere.  
Mit dääne muesch di nit scheniere.  
Syt Jorzääte nimmt men aa,  
Roothyt gääbs nur z Amerika.  
Daas isch jetz äntlig widerleggt.  
E dytsche Foorscher het entdeggt,  
ass in de hoochalpyyne Zoone  
e Huffen Indiaaner woone.  
Vom Buscheli zem alte Hipp  
sitze si vergniegt im Tipi.  
Isch s dusse kalt, dass s Gott erbaarm,  
git ene e Poncho waarm.

Der Hauptlig haisst nit eppe Täll,  
nai, dää kunnt us em Appezäll  
und schitzt sy Volgg mit alle Mittel.  
"Little Big Man", das isch sy Titel.  
Är wott, ass s kaine iiberdrybbt  
und ass e Ghaimnis Ghaimnis blybbt.  
Wie d Gschicht vom Kiibel und vom Kääs,  
wo zämmedruggt wird mit ein Gsääss,  
oder wäm dien unsri Bange  
d Bonuszaalige verdangge?

Dä Foorscher z Dytschland het e Brueder,  
nooni lang isch dää am Rueder  
und wott uns Roothyt d Kuttle butze,  
s Indiaanerghaimnis stutze.  
Är isch fir s Dryschloo, nit fir s Schwätze.  
Doo kunnt er aber bees an Lätze.  
Soome teutoonische Galopp  
begegne miir mit eme "Stop!"  
Wenn fremdi Niete däawääg wiete,  
daas losst sich unserain nit biete.  
Duet aine dumm und wird s em z wool,  
binde mer en an Maarterpfool.

Soo Bryych und Manituverdraue  
hälfen is, Gryyse z iiberhau.  
Mer saage: "Leend is doch in Rue,  
geend haim und mached d Glabbe zue.  
Eerscht wenn er aafeen, daas z begryffe,  
gryffe mer zer Friidespfyffe."

